

O LE SULU SAMOA



EKALÉSIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA MATI 2023

3email: sulusamoa@cccs.org.ws-Main Office: Ph. 24414, Ext 30 - website: www.cccs.org.ws

FAAU'UGA XI A'OGA TUSI PAIA MALUA



Susuga Faifeau Pule o Malua, Faia'oga ma le Au Faau'u, A'oga Tusi Paia Malua 2023

LE TAEAONALUA HALL, FASITOO-TAI



'O'otiina o le lipine e tatala ai Le Taeaonalua Hall, EFKS Fasitoo-tai

FAASINO UPU

1. O LE LAUGA	2
2. A’OGA TUSI PAIA MALUA	4
3. LE TAEAONALUA HALL	6
4. MAFUTAGA FAAFOUINA TINA	7
5. O LE PEROFETA MULIMULI	8
6. O AU AFIGA O LE SULU	12
7. O E UA MALILIU	14
8. ATA O MATAUPU TUSIA	16

O LE LAUGA

Tusi Faitau. Esoto 19:3-9; Mataio 21:1-11
Matua: Esoto 19:8. *“Ona tali faatasi mai lea o le nuu uma, “Matou te faia lava mea uma lava na fetalai mai ai le Alii.”*

Manatu Autu : **Vala’auina e fai ma auauna.**

Ua tofi lava le tagata ma lona faasinomaga ma lona foi tupuaga. E talitonu foi o ia faasinomaga ma ia tupuaga e auga i le faamoemoe tagata uma i le ola tautua ma le ola auauna ua le gata i Samoa nei a e faapea foi le lalolagi atoa. O le uiga o le manatu, po o le a lava le galuega o galue ai le tagata, i so o se tiute ma so o se faiva, o lona lea valaauina mai le Atua e tatau ona faatino ma faataunuu. Pe maualuga le tulaga pe maualalo, po o le taitai po o le auauna o le a lava se faiva ua filifilia i ai se tasi, o lona lena tiute e auauna ai, e galue ai, e tautua ai foi mo isi.

A e o le mea ua maitauina o le ave ma auauna i se tulaga maualuga ia po o se taitai ua galo ai i le tagata o ia o le tasi o auauna e tatau foi ona faatino lona valaauina i le faamaoni. A e ua faigata i le tagata ona manatua ona tiute faa-auauna ona ua saofai i le tulaga tofi maualuga ona manatu ifo loa lea, o ia lava ma le pule. Peitai, e le o le finagalo lea o le Atua, o tofi ma tiute ua valaauina i ai le soifua ma le

ola, o tofi lava e faatino ai le tautua. Vaai foi i le mea na faia e Iesu, fai mai le molimau a le Aposetolo o Ioane, Ua taoto e aai, a ua tago Iesu i le ipu omea ma liligi i ai le vai ma mulumulu ai vae o ona soo. Faauta i le taitai e maualuga ma mamalu a ua tuu ese lava e Iesu lona mamalu faa-Atua, ua ave ese lava lona Paia ma lona Silisili Ese, a ua fai le faiva o le tautua.

FEAGAIGA TUAI.

O le tala lea na tatou maua mai le Feagaiga Tuai, o le agai atu lea o Isaraelu i le nuu folafolaina. Ua tuanei atu fita ma faigata o le faatoa tuua o Aikupito, ua vaai foi i le tele o vavega na faia e le Atua. A e a le Sami Ulaula na vaeluaina, le alititai mātutū na savavali ai, o le vai mai le papa na feinu ai, a e le gata i lea, a o le faatoilaloina o Amaleka, atoa ai ma le anoanoai o mea tetele na faia e le Atua mo le tagata, peitai, e i ai lava le talitonuga, o loo mau pea loto ma manatu o tagata i tu ma faiga faa-Aikupito. E lē tea ese i o latou loto le laueleele na ola ma soifua a’ e ai, i lo latou manatu o Aikupito o lo latou faasinomaga ma o lo latou foi lea tupuaga, lea lava la e ui lava ina ua tuua Aikupito, a o lea lava e taulai i ai o latou loto.

O le vaega la o le tusi lea e aumai ai ni mafaufauga, o loo fetalai ai le Atua ma toe faamanatu i le nuu le malaga faaumiumi sa feagai ai ma i latou. E pei o loo faapea atu le Atua, Isaraelu, manatua le fasiga o Aikupito, manatua vavega na faia i le vao, aua foi nei galo le faatoilaloina o Amaleka, teu mau i lou loto faailoga o le alofa lē faatuaioia o le Atua. Aisea? Auā foi, o i na fai ai le Atua ma auauna, o i na faatino ai e le Atua le tautua matavela. O lenei, afai tou te matuā faalogo mai i lo’u leo, ma tausisi i la’u feagaiga, ona fai lea o outou ma oloa tāua mo’u, e sili i nuu uma; auā o lou lava le lalolagi uma.

O le manuia lea ua folafolaina mo le Isaraelu, ua lē gata ina valaauina e fai ma nuu o le Atua, a ua faapena ona tuu i ai ma le galuega e faatino, o le ā lea galuega? O le tautua, o le galue ma le faamaoni, ave i latou ma nuu e faailoa atu i le lalolagi le alofa ma le agalelei o le Atua. O le matūpalapala lea o le Isaraelu, o lana matafaioi lea ma le tiute faatino na ala ai ona filifilia o ia e le Atua. O le a le tala? Ua faalogo toeaiina o le nuu ma ua talia ma le fiafia le finagalo o le Atua. *“Matou te faia lava mea uma ua fetalai mai ai le Alii.”* O le lagona faagaetia ina ua latou talitonu i

le Silisili Ese ma le Paia o le Atua, o le lagona faamaulalo foi ina ua iloa, e lei taitai lava tutusa le tagata faatauvaa ma le Atua Paia e toatasi.

FEAGAIGA FOU.

Ma e foliga faapena le lagona o loo aumaia i le tusi a Mataio e pei ona faamauina. O lea ua maea le galuega folafola a le Alii ma ua faasaga nei ona fofoga agai i Ierusalem, ua taulai le vaai a le Alii i le tauluga o le galuega faa-uauna, le galuega e puapuagatia ai, o le tiute e fai ai o ia ma pologa. Ua silafia lelei e Iesu le tulaga e oo i ai pe a tu lauelele i Ierusalem, peitai, e lei avea lea ma ala e taofia ai lana malaga faa-tupu. A lea ua faatūtū le malaga i le mea e lamatia ai le soifua ma le ola, ua agai i le nofoaga e faatino ai le faaolataga. Talofa, e ui ina faigata a e ua alu lava. Aisea?

Le faatinoga o le galuega faa-uauna. Le Keriso ua afio mai i lona tulaga faa-tupu, seia faia le galuega faa-uauna ina ia ola ai le lalolagi agasala. Leai se sala leai se ila po o se pona lea e tautala i ai le perofeta o Isaia e 53 fuaiupu 4 “*A ua manua o Ia ona o a tatou solitulafono, ua momomo o Ia ona o a tatou amioleaga, o le a’oaiga e filemu ai tatou sa i ona luga lea, o ona faalavalava foi ua malolo ai tatou.*” E manino lelei le afio mai o Keriso e fai ma auauna, o lona lea valaauina mai lona Tamā ina ia faia le galuega faaola mo le lalolagi. Le auauna leai se gagana leai se leo a e sa faataunuu ma le faamaoni ona tiute na auina mai ai e lona Tamā e faatino ua la fetalai, *Ua taunuu, ia fai lenei mo Oe.*

Le paia o le Ekalesia aoao a o le mamalu foi o e o fiafia pea e faitau i le Sulu Samoa, a e a le faapotopotoga o tagata Kerisiano i Samoa ma le lalolagi atoa, ou te manatu, o se feau lelei lea mo i tatou a o agai pea i luma la tatou savaliga i lenei tausaga. Fai mai le manatu autu o le lauga, Valaauina e Auauna. Peitai, o se tasi lenei o upu e ese le faigata ona faatino e se tagata, auā foi, e leai lava se isi e manao e ola auauna, e fia ola pule uma tagata, ma o le vaivaiga lea o loo tele ina pa’u’u ai le toatele, auā foi, o le taimi lava e pale mai ai se tagata i se tofi poo se tiute, manatu loa, o ia ua pule, o ia ua i ai le atoaga o mea uma, peitai, ua galo ai i le tagata le mafuaaga ma le autū o lona valaauina. A o le faamanatu a le Talalelei i lenei aso, soo se tofi lava, soo se tiute ma se galuega e valaauina i ai le soifua ma le ola, pe faale malo, kamupani atoa ai ma le lotu, ia faia ma

faatino ia mea uma ma le iloa, o i tatou ua na o ni auauna. O tatou lava ua na o ni mea faigaluega e faaogā e tautua ma fa’auau le feau e pei ona poloai ai Iesu i lona au-soo ina ia tala’i ma faasalalauina atu le finagalo ma le malo o le Atua. O le a lava le valaauina pe faifeau, aoao, tiakono, o le matai, o le faletua ma le tautua, o le tama ma le teine talavou, le fanau i aoga. O le pule po o le pule lua o le tagata faigaluega malo ekalesia kamupani poo fea lava o auauna ai, aua lava nei galo ia te i tatou, o i tatou lava o auauna, ua valaauina ma filifilia i tatou ina ia fai ma fa’aa’oa’o i le lalolagi, tatou te faailoa atu lona alofa tunoa i le lalolagi agasala.

Le paia o le au-faitau, o uso ma tuafafine ia Keriso, vaai lau pito laau, nei e manatu faatauvaa i ai. O lou tiute ma lo’u foi tofi nei o tatou faatamala i ai. Le ekalesia le tatou auaunaga ma le tautua nei faatumutumu lima ona faataunuu, ona faamasinoina ai lea o i taua, a ia faia ma le filigā, faia ma le faamaoni, faia ma le loto lelei, ona faapena foi lea ona faamanuia mai le Atua i soo se feau tatou te galulue ai. Ia ma lenei le au uso e, o le ala i le pule o le tautua. E le mafai ona avea i ta’ua ma matai o se aiga pe a leai se tautua e faatinoina. A e o le a le mea ua tupu i nei ona aso?

Talofa ua pule po ua avea ma matai ona o le tele o le tamaoaga a e o lo o sisina pea le afu o le tautua matavela a le taulealea ua lē mafai ona matai ona e leai se tupe e faatino ai sona suafa matai. Ia manatua o pule uma lava e mai le Alii lea, a sesē le pule ua tau mai foi e le Atua. O lou valaauina e fai ma auauna ia fai oe o se laau mafalā e ofaga i ai lou aiga ona o le lelei o lau taitaiga ma le faatinoina o lou valaauina e fai ma auauna. Ia manuia tele lau faasausauga le Ekalesia Faapotopotoga Kerisiano i Samoa nei ma atunuu e mamao. Ia faamanuia le Atua i lau auaunaga faifai pea mo Ia ma le Tala Lelei o le Faaolataga, i galuega faasolo o lenei tausaga: Le Aso Maliu & Toetu, Le Aso Sa o Tina, Le Fono Tele, Le Aso Sa o le Tala Lelei, Le Aso Sa o Tamaiti, aemaise i Faiga Taulaga o lenei tausaga. Ia ia te Ia le viiga. Ona o Iesu. Amene.

Saunia: Susuga Risatisona Taua FS,
EFKS Saleilua,
Matagaluega FALEALILI SAFATA SIUMU

FAAU'UGA LONA 11, A'OGA TUSI PAIA MALUA

O le Sauniga o le Faau'uga lona Sefulu Tasi a le A'oga Tusi Paia a Malua (Malua Bible School), sa faia i le Fale Iupeli, Malua i le Aso Toonai 18 Mati 2023. O le susuga Asotasi Gu Time FT, le Taitaifono Komiti Au Toeaina & Komiti o Malua, sa ia ta'ita'i le sauniga mamalu ma saunia le Lauga faala'ei'au mo le au faau'u faapea le mamalu o le faapotopotoga. O le susuga Amuia Seuala FT (Toeaina Faatonu, Itu o Tane) na faitauina le Tusi Paia, a o le susuga Aviti Etuale FT (Toeaina Faatonu, Vitoria) na saunia talosaga. O Pese ma Viiga na lagiina e le Kolisi Faafaifeau Malua. O le tauaaoina atu o Tusi Pasi o le mamalu o le au faau'u, sa nafa ma le Ta'ita'i o le Sauniga, faapea le Faifeau Pule, le susuga Dr. Vaitusi Nofoaiga FS ma le lagolago a lona soatau, le Pule Lua susuga Makesi Neemia FS. O le Tala/Ripoti Faaletausaga o le Aoga Tusi Paia na saunoa i ai le susuga i le Pule o le Kolisi Faafaifeau ma le Aoga Tusi Paia, Dr. Vaitusi Nofoaiga. E to'ua 49 i latou ua faamanuiaina i lenei tausaga, i Tusipasi ma Tipiloma o Mataupu Silisili. Na molimauna e le toatele o Toeaina, Faafeagaiga ma Faletua, o aiga ma uo lenei faamoemoe, e faamalo ma faamanuia e tusa o lo latou tautiga e su'esu'e ma saili i afioga paia a le Atua ma mataupu tau le Malo o le Atua ma le Tala Lelei ia Iesu Keriso.

Ua molimauna le siitia pea i luga o le numera o i latou o loo fa'aaogaina lenei auunaga a le Kolisi Faafaifeau e ala i lana Aoga Tusi Paia, ma ua le faapito foi i tagata tapuai o le EFKS, a ua faapea foi i isi ituaiga. O se tasi foi laasaga taua tele na amata i le tausaga ua tuana'i, o le tatalaina lea o le Aoga Tusi Paia mo Matagaluega i Niu Sila, e ogatotonu i Aukilani. Ua maitauina foi le toatele o faletua o A'oa'o e i'u mai le Kolisi ua a'oa'oina ai, e saunia atili ai mo le galuega o faatalitali mai. O loo fa'aaauina pea foi le auunaga a le susuga i le Faifeau Pule ma Faia'oga, mo le faatinoga o le a'oga i Salafai i vaiaso taitasi, mo i latou i Matagaluega Faasaleleaga ma le Itu o Tane o loo resitara mo mataupu o lenei tausaga. Malo le saili malo mo le Atua ma Lona malo. O suafa o i latou na faauuina i lenei tausaga, mai Ekalesia ma MATAGALUEGA taitasi:

Certificate in Theological Studies - Level IV

1. ***Faumuina Tuanei Tuigamala Setefano*** - Tiakono, EFKS Leulumoega, AANA
2. ***Fereti Mamoe Leota*** - Tiakono, EFKS Peteleema fou, FALEATA
3. ***Kerisimasi Laulu*** - Tagata Lotu, EFKS Faala, FAASALELEAGA
4. ***Lafaele Lapi*** - A'oa'o Malua
5. ***Lealii'e Mautanoa Tuaimalo A. Ah Sam*** - A'oa'o Fesoasoani, EFKS Vailele, VAIMAUGA
6. ***Leasuasu T. Faalogo***-Tiakono EFKS Apia, APIA
7. ***Letufa Kesi*** - Autalavou, EFKS Iva, FAASALELEAGA.
8. ***Luamanuvae Teleni Afamasaga*** - A'oa'o Fesoasoani, EFKS Vaiala, VAIMAUGA
9. ***Lupega Fale Savelio Siaoloo***, Tiakono EFKS, Motootua, APIA
10. ***Magele Etuati Ropeti*** - A'oa'o Fesoasoani EFKS Iva, FAASALELEAGA
11. ***Malatai Esera*** - Faia'oga A'oga Aso Sa, EFKS Mulinuu, APIA
12. ***Muā'ausā Olo Aleni Uelese*** - Tiakono, EFKS Magiagi, APIA
13. ***Pauniasi Ioane Sao*** - Tiakono EFKS Matautu-uta, APIA
14. ***Seumanutafa Nepo Laufau*** - Tiakono EFKS Magiagi, APIA
15. ***Sooalo Otila Sooalo*** - Team Ministry, Christian City Church.
16. ***Suafu'a Sasagi Paiaaau*** - Tiakono, EFKS Salelavalu, FAASALELEAGA
17. ***Sualii Tueipi Rapi*** - A'oa'o Fesoasoani, EFKS Salelavalu, FAASALELEAGA

-
18. **Taeamo Galo** - Faletua A'oa'o I'u Malua Ekalesia Tuvalu.
19. **Taupā'ū Mika Leo** - A'oa'o Fesoasoani, EFKS Ululoloa & Si'usega, FALEATA
20. **Togiai Eteuati Faiilagi** - Tiakono, EFKS Faatoia, APIA.
21. **Tufeaο Faatuai Fanolua** - Tiakono, EFKS Solosolo, VAIMAUGA.
22. **Tuilagi NFM Saipele Esera** - A'oa'o Fesoasoani, EFKS Vaimoso, FALEATA.
23. **Tuiloma Aneseta Mataia** - Tagata Lotu Penetekoso Vaimoso.
- Diploma in Theological Studies - Level V**
1. **Aifala M. Esau Poufa Faletoese** - Faletua A'oa'o I'u Malua, EFKS Apia, APIA
2. **Ataata Leatigaga** - Faletua A'oa'o I'u Malua EFKS Springfield Lakes, KUINISELANI
3. **Crystal Isaia** - Faletua A'oa'o I'u Malua EFKS Tuanai, MALUA
4. **Faalaniga Isaia** - Faletua A'oa'o I'u Malua EFKS Blockhouse Bay, AUKILANI
5. **Ferite Kalepo** - Faletua A'oa'o I'u Malua EFKS Malie, MALUA
6. **Fuifui Anae** - Faletua A'oa'o I'u Malua EFKS St Mary's, NIUSAUELESE
7. **Jedda Korā** - Faletua A'oa'o I'u Malua EFKS Vini Fou, APIA
8. **Kate Lomialagi Limuaa** - Faletua A'oa'o I'u Malua, EFKS Saoluafata, APIA SASA'E.
9. **Mulitalo Feterika Mulitalo** - A'oa'o Fesoasoani, EFKS Lano, FAASALELEAGA
10. **Muagututi'a Talaleu Arasi Faapito**-Faia'oga Aso Sa, EFKS Saipipi, FAASALELEAGA
11. **Olivia Maotua** - Faletua A'oa'o I'u Malua EFKS Salesatele, FALEALILI SAFATA SIUMU
12. **Penerosa Toilolo** - Faia'oga Tusi Paia, AOG Harvest Centre.
13. **Pepe Vaiala M. Sasa** - Faletua A'oa'o I'u Malua EFKS Saipipi, FAASALELEAGA
14. **Rerepairere-O-Mere Vaai** - Faletua A'oa'o I'u Malua, EFKS Newcastle, NIUSAUELESE
15. **Saunimaa Ma Fulu-Aiolupotea F. Kolia** - Tiakono, EFKS Vailele, Papa Sataua, Fusi, Sili.
16. **Shirley Elisara** - Faletua A'oa'o I'u Malua, EFKS Moataa, VAIMAUGA
17. **Silau Utaiaana** - Faletua A'oa'o I'u Malua EFKS St. Mary's, NIUSAUELESE
18. **Susana P. Liufau** - Faletua A'oa'o I'u Malua EFKS Faleasi'u, MALUA
19. **Taliilagi Vaoita Suesue Te'o**-Faletua A'oa'o I'u Malua, EFKS Poutasi,FALEALILI SAFATA SIUMU
20. **Tuafale Leiataua** - Faletua A'oa'o I'u Malua EFKS Faleasi'u, MALUA
21. **Tulaga Atonio** - Faletua A'oa'o I'u Malua EFKS Iva, FAASALELEAGA
22. **Unasa Faaetia Elizabeth Ah-Poe** - Tagata Lotu, EFKS Leulumoega Tuai, AANA.
23. **Vaifale Pueiata Akisa** - A'oa'o Fesoasoani EFKS Samalaeulu, ITU O TANE
24. **Valma Mata'avatele Tagaloo** - Faletua A'oa'o I'u Malua, EFKS Condell Park, NIUSAUELESE
- Certificate in Theological Studies Level IV & Diploma in Theological Studies - Level V**
1. **Fiapa'ipa'i Loto Papali'i** - Ekalesia Katoliko
2. **Raymond J. Schuster** - A'oa'o Fesoasoani, Lotu Porotesano Apia.
-

LE TAEAONALUA HALL, **EFKS FASITOO-TAI**

O le Aso Faraile 3 Mati 2023 na faapaia ai le maota tele/maota taalo, ua faaigoa o “*LE TAEAONALUA HALL*” a le EFKS Fasitoo-tai, o galulue ai le susuga Eric Mulitalo FS ma le faletua ia Amata. O le faletua ia Susana TS Iosia na ia ooti le lipine e tatala aloaia ai le galuega tele, ulufale le au valaaulia mo le sauniga e faapaia ai le maota. O le Toeaina Faatonu o le Matagaluega AANA, susuga Ailepata Leuta FT, na ta’ita’i le sauniga mamalu na auai ma molimauina e le afioga Taitaifono Fono Tele, susuga Tunumoso Soliola Iosia FT ma le faletua ia Susana, susuga Toeaina ma Faafeagaiga ma faletua o le Pulega Alofi ma le Matagaluega Aana. Sa faapea foi ona auai le aufaigaluega o faafeagaiga taulagi a Ekalesia eseese o le afioga i Fasitootai, ma le mamalu faalemalo i le afioga Fofoga Fetalai susuga Hon. Papalii Taeu Masepau, le Minisita o le Matagaluega Puna’oa Faanatura ma Siosiomaga, Hon. Toesulusulu Cedric Schuster ma le toatele o aiga, uo ma paaga a le Aulotu.

O le Tala o le Galuega na saunia ma fofogaina e le susuga i le faafeagaiga, Eric Mulitalo FS. O se galuega sa tumu i faafitauli na faalavelaveina ai le sologa lelei, ona o le le faamaoni o nisi konekarate sa tuu i ai le faamoemoe, ma na oo ai lava i luma o le Faamasinoga mo le sailiga o le amiotonu ma se faai’uga tatau mo nei ituaiga auaunaga. Ui i lea, sa le’i faavaivai ai le Ekalesia i nei faafatiatama’i, a e sa onosai pea ma faamalolosi i le talitonuga, o loo latou galulue faatasi ma le Atua e silafia mea uma, ma na te le tuulafoai lana fanau faatuatua, ua i’u ai ina taunuu manuia e pei ona molimauina i lenei aso.

O le mae’a ai o le umusaina o le Maota o le Galuega ia Oketopa 2020, na fai ai Tauofoga mo se Konekarate e fausia le maota fou, e tusa ma fuafuaga faataatitia mo galuega e lua. E 5 konekarate sa fai ai le filifiliga, na manumalo ai le Green Builders a Tusa John Hunt i le tau e \$950,000, mo le 20 vaiaso e fausia ai. O le aso 27 Novema 2020 na sainia ai le feagaiga ma tuu atu ai le ulua’i peimeni \$100,000 mo ulua’i tapenaga o le galuega. E ogaoga faaletonu sa tula’i mai, ma faamuta ai loa le feagaiga i le aso 1 Novema 2021. Na toe sailia se isi konekarate e fa’auauina, ma maua ai i le RACONA a Tuala Lole Stowers. O le aso 15 Me 2022 na toe amata ai le galuega i le tau e \$672,000 mo le 20 vaiaso. E ese

mai ai i le tau lenei, le tau o le isi konekarate, le COASTAL Construction a le alii pule ia Donald, sa nafa faapitoa ma le faamae’aina o le u’amea atoa o le galuega. E \$54,000 le tau o lea vaega mo le 9 vaiaso. O aiaiga o feagaiga ma nei konekarate e lua, o le a faatau e le Aulotu o meafaitino/meafaufale uma (material), a e o le a totogi atu na o le faatinoga (labour). O le Racona @ \$9,000 x 20 vaiaso, a o le Coastal @ \$6,000 x 9 vaiaso. O le tele o faafitauli na tula’i mai, faatasi ma le siitia o le tau o oloa, o le taofia ona o le Faama’i Koviti 19, sa le mafai ai ona mae’a i le taimi sa fuafuaina. Na mae’a le galuega a le Coastal Construction i le aso 7 Oketopa 2022, a o le Racona i le aso 24 Fepuari 2023. O le tau atoa o le galuega, i lona toe fausia ma faalelei ai mea sa faaletonu, mai le aso 15 Me 2022 e oo mai ia Mati 2023, e tusa ma le **\$986,254.52**. Sa i ai nisi vaega itiiti na tau faamae’a, sa galulue i ai le Aulotu, faatasi ma le fesoasoani tele a le susuga Toala le kamuta na latou feagai, i lalo o se feagaiga sa faia ma le Mafutaga Tina.

O le faatupeina o le galuega sa feagai ma le Ekalesia, i sailiga tupe masani o Lulu, Tausala, Bingo, faatauina o koko ma isi, faatasi ma fesoasoani mai mafutaga alo ma fanau i Aukilani ma Ueligitone Niu Sila, Purisipeni, Sini ma Melepone Ausetalia. Na fesoasoani foi alo o le faafeagaiga \$50,000 ina ua mana’omia tele se tupe. O le nogatupe faaopoopo mai le NPF e \$400,000 (aofai atoa e \$800,000) ma le SCB e \$100,000. O loo galulue uma i ai itutino o le Ekalesia mo le totogiina o nei aitalafu. Ona saunoa lea o le faafeagaiga i le viiga o le Atua, e ala i le faafetai i vaega eseese na tofu sao i lenei galuega - o le Ekalesia Aoao, le Matagaluega Aana, le Pulega Alofi i ona Aulotu taitasi, lo latou nuu aemaise i le Ekalesia i ona Matafale ma aiga taitasi, faapea itutino eseese ma Mafutaga alo ma fanau a le Ekalesia.

O le afioga i le Taitaifono o le Fono Tele, susuga Tunumoso Iosia Soliola FT na ia saunoa fai ma sui o le Ekalesia Aoao e molioo le faamalo ma le faafetai, i le susuga faafeagaiga ma le faletua ma le Ekalesia i Fasitootai, mo le galuega tele ua faia, e ui ina molimauina le tele o faafitauli sa tauasa mai ai. Na ia faamalosi’au foi i le soifua galulue pea ma le faatuatua, aua o loo totoe pea aitalafu e tele o fia totogi; e le oge auala le Atua e fesoasoani mai i tagata faamalolosi. Ona ia tauaao lea o le meaalofa a le Ekalesia Aoao e \$10,000, ma tauluga ai lea aso i le taumafataga ma fa’aaloaloga masani faaleaganuu.

MAFUTAGA FAAFOUINA **TINA 2023**

O le Mafutaga Faafoouina a Faletua o Toeaina, Faletua o Faifeau ma Tina Penisione o lenei tausaga, sa faia i le Maota o Tupulaga EFKS i Mulinuu i aso 14-15 Mati 2023. O le Manatu Autu o le Mafutaga i lenei tausaga: O le Tina, o le Auauna a Keriso. Na tatala le mafutaga i le sauniga lotu sa ta'ita'i e le Taitaifono, Otaota Alosina Vavae, o ia foi na faitauina le Tusi Paia ma fai le Lauga, o talosaga na saunia e Faletua ia Taualogomai Paul Gray, Matuli Harima LeMamea, ma Suasami P. Tuuau (Faletua Toeaina Malii). O Pepa o le Mafutaga na valaauina ai le afioga i le alii foma'i ia Leausa Dr. Take Naseri mo le mataupu tau le soifua maloloina ma gasegase ogaoga, ma le faletua penisione ia Saitutuila Timoteo Momoemausu na saunia le Pepa faaleagaga mai se Faletua ua mapu mai le galuega, mo le faafoouina ma le faa-aupegaina o le aufaigaluega galulue. O nisi polokalame o le mafutaga e aofia ai fa'aaliga taleni i pese, siva ma faaevagelia mai le nofo a Matagaluega i Samoa ma atunuu i fafo. Na taape fiafia le Mafutaga ua mafatotoga i faalumaga o le tino mafaufau ma le agaga, ma le faamoemoe aulia le Fono Tele o lenei tausaga, ona toe feiloa'i foi lea i le laumua i Malua mo fonotaga, tapuaiga ma isi foi mafutaga. Malo le mafuta i Tina o Auauna a Keriso!

LE FAAMATI 2023

O se tasi o galuega a le Ekalesia e faatino e Aulotu taitasi o le Faamati, e faia i le masina nei o Mati e pei ona faaigoa ai talu mai le amataga o lenei vaega taua o le galuega. O se taimi talafeagai tonu lenei na fuafuaina i le tofa ma le faautaga a Tama o le Ekalesia i aso ua mavae, e faaoloina ai le aufaigaluega, a o sauni atu mo le Fono Tele ia Me. O le galuega e faia i tausaga taitasi, e ui foi ina sa feagai le atunuu ma Faama'i ogaoga talu ai, a e sa le'i tuua ai lenei galuega. O le Faamati o le galuega e fitoitonu i afioga Tiakono Toeaina ma Faletua, a e mafuli i le faatinoina e le Mafutaga Tina ma le itupa o tamaitai, e silasila ai i le faaleleia o le itu i fafo o le galuega - i malumalu, maota o le galuega, maota o le faafeagaiga, o le faatotogaina ma faaoloina o le maota e malu ai le aufaigaluega, ma mea uma e tatau ma manaomia i lea taimi ma lea taimi i le galuega. Malo le galulue. Ia fai ma viiga o le Atua, na te faapaia ma faamanuia le taulaga Faamati ua faia o lenei tausaga.

MAFUTAGA FAIA'OGA A'OGA **ASO SA & TA'ITA'I AUTALAVOU**

O le masina lenei o loo faagasolo ai le polokalame a le Matagaluega o A'oa'oga Kerisiano, o Mafutaga Faafoouina a Faia'oga A'oga Aso Sa & Ta'ita'i o Autalavou, i le nofo a Matagaluega i Samoa. O lenei polokalame e ta'i lua tausaga ma fai, e saunia ai e le afioga i le Faatonu o A'oa'oga Kerisiano ma le Matagaluega, i susuga i Faifeau ma A'oa'o ma Faletua, ni faatinoga o Mataupu a Vasega o le A'oga Aso Sa. O faatinoga nei e faavae ma auala mai ai le faasoa i fautuaga ma fesoasoani, i le toe iloilo, teuteu, ma faaleleia atili o auala o loo fa'aaoga e faatino ai le galuega a Faia'oga A'oga Aso Sa mai lea taimi i lea taimi. Ua maitauina le naunautai o le Matagaluega ina ia fa'aaoga lelei masini ma auala faatekonolosi, o mea fou nei, e fesoasoani tele i metotia tuai, i le a'oa'oina o fanau i A'oga Aso Sa. O masini faaonaponei e pei o laptops, monitors, projectors, ipads, keyboard, speakers ma isi, o meafaigaluega e fesoasoani tele, pe afai e fa'aaoga lelei ma le tatau, e momoli ai le mataupu faale Tusi Paia. Pau o lea, e molimauina le tele o Aoga Aso Sa, latou te le gafatia nei masini faaonaponei.

Ui i lea, o loo fautuaina malosi foi e susuga Toeaina ma le aufaigaluega Faifeau ma Faletua, ina ia faautauta lelei le fa'aaogaina o nei mea fou. O le itu sili ona manaomia, o le saunia lelei lea o le Faia'oga A'oga Aso Sa, i Aso Sa taitasi mo lana galuega faa-faia'oga Aso Sa. E le faaititia le taua o auala ma metotia faavae - le Auala Tuusa'o, Auala Fetufaa'i, Fa'aaogaina o Ata, ma isi auala e fa'aaoga i ai le agavaa ma le talenia o le faia'oga. E faapea foi ona fautuaina le saunia lelei o Tusi A'oga Aso Sa ma Tusi mo Mataupu Autalavou a le Matagaluega. O loo a'oa'oina ai le Vi'i o Tupulaga Talavou EFKS, o saunia e le MAK ina ia silafia ma pepese faatasi ai Autalavou Aoa pe a potopoto faatasi. O le Matagaluega o A'oa'oga Kerisiano, e i lalo o le vaaiga a le Komiti A'oa'oga Kerisoano a le Komiti Au Toeaina. E tofu le Matagaluega a le Ekalesia i Samoa & atunuu i fafo ma lona Ofisa, o se Faifeau po o se A'oa'o I'u mai Malua. E to'a tolu ofisa o mataupu tau Musika ma le A'oga Ta Piano, o le ofisa e toatasi tau Taaloga, ma faletua e to'a fa o loo galulue ai. O le Faatonu Lagolago o le susuga Peteru Seiuli FS, a o le Faatonu o A'oa'oga Kerisiano o le susuga Maleifua Tanielu FS.

O LE PEROFETA MULIMULI

(O le tala faa-fagogo ua faa-Samoaina mai le tusi, The Last Oracle, tusia e James Rollins)

12.22 afiafi.

Atumauga Urale i Saute.

Na tamo'e Monike ma Piota i ona lima i autafa o le vai. Na pipi'i mau le tama ia te ia. Sa tioata pea ona mata, o ona foliga sa susū i la afu ma loimata. Na saosasoa atu i luma Kisika, o mulimuli atu i le la'a la'a tetele a Marata i ona lima e lua. Sa tausisi pea Konesetativo i tafatafa o Monike.

“E faapefea ona tatou iloa e moni le mea na iloa e Piota?” na fesili tau mole atu ai Monike ia Konesetativo. “O taika? Atonu pe na o se miti i le ao teatea, o se moe vavale a o savali.”

Na liliu le tama e matua atu ma si'i a'e i luga lona pulou ie mamoe. Na selu i tua lona lauulu e iloa atu ai le iila mai o se uamea lolo'u i tua o lona taliga. “E le na o oe le tagata sa fai le ta'otoga.” Na ia tuu ese lona pulou ma geno atu ia Piota. “E lē se miti le mea na ia vaaia.”

Na tauivi Monike i lona fia malamalama. Ua uma ona faamatala e Konesetativo pe faapefea ona oo mai Monike iinei, ina ua lavea'iina mai se vaa-afi, ona o se tusiga ata na fai e le tuafafine o Piota. Sa le'i i ai se uiga o nei mea. Atonu o ia le tagata o loo miti i le ao teatea.

Na fa'auau Konesetativo, “E lua taika Siperia o loo i ai i le Menagerie. O Arakati ma Sakara. O nisi aso e tutuli ai faatasi ma fitafita i le vao maoa. O pua'a vao feai ma aila o le vao. E popoto tele. E lē faigofie ona faasesē.”

“O le a le mamao ese?” na fesili ai Monike.

Na tautala atu faa Rusia Konesetativo i le tama.

Na tali atu Piota i le gagana lava lea e tasi. A o ia tautala, na faasolo ina mautū lona leo, o loo sau mai totonu o se faaliga.

Na i'u ina luelue le ulu o Konesetativo. “Na te lē iloa. Pau le mea mautinoa o loo o mai. O loo ia mafai ona tofo i lo la'ua galala.”

Na faanatinati atu e Monike i latou i lalo o le tafe i le mea e sasa'a atu ai i le vaitafe tele. Na ia lagona muamua le gogolo o le vai a e na te le'i vaaia. Na ia eliina se alavai loloto. Pe ana mafai lava ona latou sopoia atu –

Na latou faalogoia se 'e'e malosi na faatumulia ai le 'ea. O luga a'e maualuga ma i tua atu i le auala va apiapia. Na 'e'e faasoloatoa pei o se sailini. Na lagona le magiagia o nifo ma le gatete o ivi ona o

lenei leo. Na faapa'u'ū faō tamaiti i lalo i le palapala, ufiufi o latou ulu i o latou lima ma taavalevale solo. Na 'ū'ū ane Marata ma tagi faataamilo e puipui tamaiti.

Na autilo a'e i luga Monike i le va o lau ma lālā laau, a o mimigi solo i le malosi o le leo taalili. Na i ai se mea na faatifa ifo i le afa i tua o le vanu. Na faaopeopea i luga o se parasuti mūmū, pei o se sulu felea, a e na ia tauaveina se u'amea lapotopoto o lona lapo'a pei o se pesipolo. O le mea lea na sau ai le leo o le sailini. Pei se sulu siufofoga. Na a'e Monike i luga o se 'alā lapo'a, ma iloa atu ai nisi mea mūmū e mamao atu. O isi foi sulu felea.

Na ia toe alu ifo i lalo.

E pei o loo latou saili tauaso i soo se itu.

Na faate'ia i le pa'ū ifo o se mea mamafa i le itu mamao ese atu o le vai.

Na taia i le vaai a Monike le emo mai o fulufulu eena. Na tātā vale lona fatu i le atuatuvaale.

Taika.

Peitai ua te'i ina ua feosofi ane ni aila se lua i ona luma, ma toe sisiva vave ese i o la'ua vae laiti.

Na faamalosi e Monike lona fatu i fafo i lona fa'a'i ma savali atu i le mea sa i ai tamaiti. O le leo o le sailini na ia matuā faataatitia i latou. Na iloa e tagata tutuli, le agavaa o tamaiti e iloa gofie ai tulaga ma'ale'ale e lamatia ai, o le ala lea na latou taumafai ai e faavaivaia o latou faalogoia.

Na tago atu Monike afisi mai Piota i lona lima mutu ma togi a'e i luga o lona tau'au. Na ia toso a'e Kisika i luga i ona vae ma opo mai i lona manava, sii a'e i luga. Ma le mamafa o lana avega, na gaasolo atu Monike ia Konesetativo, fuafua e kiki le tama ia gaioi. E lē tataua ona latou faatali pe malolo.

Na faalavalava ane Marata. Na ia tuu atu lona isu i le fatafata o Konesetativo ma tulei le isi ona lima i lona tua. Na ia taofi le tama i ona tau'au, ma sese'e ifo agai i le vaitafe o i lalo. Na toso atu vae o le tama i ona tua.

Na mulimuli atu Monike ma isi tamaiti e toa lua. E ui ina punitia lana faalogo i le leo o le sailini, a e na lagona e Monike le gatete ma le oi o le tama i le tiga. Na ia faataalise ma taunuu i le vaitafe.

Na tafe atu le vai i totonu o se alavai e loloto ona auvae, e atoa le fa'mita le lautele. Na tatafe ma gāsēsē leotele, na tau punitia ai le ma'ama'ai o le leo o sulu siufofoga.

Na tālo atu Monike ia Marata. Na ia tusi atu faasino i le vaiatafe. Na suigi atu ai o ia i le itu lena. Na latou fa'auau, mulimuli atu ai i le auala femilomiloa'i solo. Na uma atu nisi pi'oga ma nisi tuasivi, ma poloka atu ai ma le leo taalili.

Na muamua minoi Kisika. Na ia faapa'ū ese mai lima o Monike ma tu i ona vae. O loo pupuni pea ona taliga i ona alofilima. Na sosoo atu ai ma Konesetatino, i lona faapa'ū ese mai ia Marata, o loo selasela ma osooso i ona lima.

A o latou sosola ese mai le leo 'e'ē, sa fai lava ma autilo ifo i tua Monike.

Sa ia faatalitali toetiiti lava se taimi latou vaaia ni taika se lua e osofai i latou.

Na te'i o ia i lona lāvea ia Kisika ua tu. Na lavelavea, toatuli i luga o ona tuli, ma tuu le tama i lalo.

Ua tu foi Konesetatino i autafa o lona tuafafine, ua matuā malō faatasi ma Marata. E i ai se isi mea e sili atu le mata'utia e lamatia ai i latou, nai lo tagata tutuli o i latou tua.

O luma atu, na tula'i a'e ai se urosa tele lanu enaena mai auvai o le vaiatafe. Atonu e atoa le ono selau pauna le mamafa, o loo susū mai le vaiatafe, ma e manino mai lona mata'alia ona o le sailini ma lona 'e'ē malomaloā. Na pulato'a ane mata uliuli o le manu i la latou vaega. Ona ia tu a'e lea i ona vae, o lona maualuga e atoa le valu futu, ua lūlū le tino, ua gū ma fa'aali mai ona nofo lanu samasama.

O le Rusia taufufulu. Le faailoga o Tina Rusia.

Na tagi o ia, faapa'ū i lalo, ma osofa'i malosi ane loa ia i latou.

6:03 taeao.

Uosigitone.

Na ala a'e le tamaloa matua i le malamalama. Na taia tutui ai ona mata ma oo atu i lona fai'ai lona matuitui. Na ōi ma liliu ese lona ulu. O lona faafaufau na masa'a pei se vanu o loo mu i totonu o lona fa'a'i. Na ia folo patatō i totonu.

Na ia emo ese mai le pupula ma na iloa ai o loo saisai o ia i se moega. E ui ina ufiufi o ia i se ie, a e na ia iloa o loo telenoa o ia. O le potu sa matuā pa'epa'e atoa, o se nofoaga o taotoga, ua faavailaau. Leai ni faamalama. Na o se faitoto'a e tasi ma se faamalama o loka tu'imau. Tapuni.

O se tagata sa nofo i se nofoa i autafa o le moega, e fai lona suti, o le peleue o loo tautau i le faalagolago o le nofoa, o lima o le ofu sa afe i luga. Na faanapevae, o ona lima ta'ai i luga o ona ogavae.

Na ia punou atu i luma. "Talofa i lenei taeao, Iuri." Na ataata ifo ia te ia Tereni Makepalai, aunoa ma se foliga lelei.

Na tilotilo ifo Iuri i lona fatafata, na ia manatua sa tui o ia i se vailaau faafilemu. Na ia minoi ma su'e solo, lē mautonu, niniva.

"Sa tui oe i se vailaau faaosofia," na fai atu Makepalai. "E te mataala ai, ona e fai sina tele o mea ta te fia talanoa ai."

"Kak..ia.." na tau mole mai ai, o lona laulaufaiva ua mafafafina ma pei se faapipii.

Na mapues Makepalai, aapa atu i le laulau sa i ai se ipu ma se mea e mimiti a'e ai o loo taatia i, ma tuu atu ia Iuri e inu.

Sa le'i teena e Iuri. O le vai mafanafana sa mu e pei o se voka e sili ona malosi. Na ia tulei ese le faanefu i pito o ona manatunatuga ma fufulu ese le mea faapipii mai lona laulaufaiva.

"Tereni, o le a lau mea lea ua fai?" na fesili Iuri a o ia tau toso nonoa o faamau ai ona lima.

"O loo tau faatutumu avanoa." Na oomi e Makepalai se faamau i ulu o le moega. "E pei ona sa ou fai atu, e te le'i oo faalelei mai ma le auililiga o au su'esu'ega i Keliapisi 88. E tataua ona tatou faasa'o le faalētonu lena."

"O le a le uiga o lau tala?" Na taumafai Iuri e faaleo lona loto mama, a e na faiaina leaga i le tete o lana tautala atu. Na ia moomoo o ia se tagata e malosi atu.

"Hmm," o Tereni lea. Na ia punou atu ma aveese le ie na faa'afu ai Iuri. "Ou te manatu e sili ai ona faate'a ese le vaega matagā, ina ia ta talanoa e pei o uo ma paaga moni."

Na autilo ifo Iuri i lona telenoa. O lona pa'u sesega sa togitogi i ipu, lapopo'a pei ni tupe siliva, laualuga ai se faapona pei o se fatu pi, o elekoroni o nonoa ai se enetena manifinifi. Na faamauiina i ona vae mai le vaematua e oo i lona puimanava. O lona fatafata sa pei o se laupapa o le mu i ipu piipii.

A e na te le'i fesiligia po o a nei mea, a e matala le faitotoa o le potu ma ulufale mai se tagata tino pa'e'e. Na fiu Iuri e tau manatua lona igoa, ona e le'i umi ona ia feiloai i le tamaloa. Fomai Iakopo Segi. Sa latou faaoga le ofisa o le tagata su'esu'e mo le fono i Ualeta Riti.

Na tapuni mau le faitoto'a. Leai se leo e sao i fafo. Na savali atu Segi ia i la'ua. Na ia uu atu se lapetopa o matala i ona lima. "O tatou uma ua faavasegaina." A o nofo ifo le tamaloa i le nofoa ma tuu lana lapetopa i le laulau o le moega, na iloa atu i si'umata o Iuri le

ata o le komepiuta a e le'i faasaga ese. Sa i ai le ata faatusa o se tagata o faaloloa, o togiotgi i faalapopototo o loo mumū.

“O tui faa-elektoroni,” na fai atu Makepalai ma tālo atu lona lima i le faaputuga o ipu.

“O elektoroni laiti ua ulufia i totonu o tui vilivili. Ou te lē fia malamalama atoatoa i ai. O le matafaioi lea e fitoi tonu ia Fomai Segi. Ua iloga le alualu i luma o ana su'esu'ega e fa'aaogā ai lenei metotia e faaititia ai le tiga, ua mafai ai ona fai taotoga i nofoaga o taua aunoa ma le tele o lavelave. O se galuega ma'oe ma o le mafuaaga lea ua avea ai ma Iasoni. Ona ou faa-faigaluegaina lea mo la matou su'esu'ega fai faatasi ona o lona atamai faapitoa i maikoeletoroni. Maikoeletoroni e pei ona sa e fa'aaoga i au foi suesuega.”

Na eueu e Makepalai se tasi o enetena i lona tamatamailima. Na faalogoina e Iuri le tutui o le tiga. “Ua matou iloa nei o le mea e faa'aaoga e faaititia le tiga i le taimi sa'o, e mafai foi ona aogā e faateleina ai.”

“Tereni.. 'aua..” na augani ane ai Iuri.

Sa le'i amanaiaina o ia e Makepalai, sa liliu atu ia Segi, ma faasino atu i le ipu sa i autafa o lona tulivae, ma lona lua sa i autafa o lona manava.

Na sii i luga e le tamaloa su'esu'e s'peni ma tusi se laina i luga o le komepiuta.

Na iloga le matuitui aasa o le tiga i le vae o Iuri. Na maoga a'e le faataiō mai lona fa'a'ā. E peisea'ā na 'ili e se tasi se agaese mai lona tulivae e oo i lona manava, ma seleia ai ona ponaivi. Ona toe vave mou ese lava lea.

Na tagotago ifo Iuri su'e solo i lalo a o ia tau mānava. Na ia faapea e tau atu i ni toto masaa, ma aano tipitipi. Peitai na o le pa'u ua sesega.

Na toe tālo atu Makepalai i le fola mai o ipu ninii. “E mafai ona matou faia faapea i soo se fesootaiga. I soo se mamamu. E mafai ona matou 'ili olaina oe aunoa ma se afaina o se laulu. O se taotoga o i ai tiga uma.”

“Ai..aiseā?”

Na toe tetē ifo Makepalai ia te ia. E ui ina agamalū ona foliga, a e sa sauā ona mata. “O le a ou maua mai tali, ua lelei? Tatou amata i mea o loo e natia faasino i tamaiti.”

“Ou te lē—”

Na faasaga atu Makepalai ia Segi. “Leai!” na 'e'ē atu ai Iuri.

Na toe faalagolago atu Makepalai ia te ia. “Ia 'aua la le faia taaloga. Sa mafai ona matou toe

faavasegaina au faaopoopoga aunoa ma se faafitauli. O ata na aumai e la outou vaega sa atoatoa ma ma'oti lelei. Peitai i le i'uga, sa le'i faaosofia ai. Na o se metotia lavelave. Na matou taumafai e kopi faaluaina au faaiuga, e fa'aaoga ai ni tamaiti lē atoatoa popoto faapitoa i Kanata. O la matou su'esu'ega... e sili ia ona faapea atu, sa lē manuia.”

Na oono i totonu Iuri. O lona uiga sa latalata atu le au Amerika nai lo le manatu o Savina. Ua latou silafia e tulaga ese le laasaga sa i ai Keliapisi 88.

“O lea la,” na toe fesili atu ai Makepalai, “o a mea o loo e natia mai ia matou?”

Na umi ona faatali Iuri. O se tipi aasa na tosi faalava i lona fatafata. Na feoi ona maso, ma fuli lona tua mai le moega. Na ia faataiō leo tele a e leai se leo e sau.

A o motu ese atu le tiga, na gatete ma lūlū le tino o Iuri i osofaiga mulimuli. Na ia tofoina le toto i lona laulaufaiva. Ui i lea na te lē gafatia ona faatali. O le ā le mea e i ai pe a maua ane e Amerika? Ua tuai lava. “O DNA,” na ia tau mole ane ai. “O latou sela faa-tamali'iaga.”

Na punou atili ifo Makepalai. “O le a le uiga o lau tala?”

Na tau folofolo fāua o Iuri, tau mānāva mo sina 'ea. “O le mea lilo o loo i totonu o kenero o le tagata. Na faato'a matou mauaina lena mea i le sefululua tausaga talu ai.”

Na faamatala e Iuri i le va o tiga ma lona tafiti solo, i fesili fai soo a Makepalai. Na ia faamatala le sailiga i le 1959 o se faaputuga o tamaiti talenia faapitoa, o tamaiti Kipisi. O se laina faa-kenera sa sosolo i le tala faasolopito o le au Kipisi. O Kiovani. Sa taofia ma natia e nei au aiga lenei mea lilo, ma faasao e ala i o latou fanauga, ma i'u ai i lavelave faakenera. Na ia ta'ua le mea na gaoia ai e Rusia lenei sailiga i kenera mo a latou su'esu'ega, mo le faaopoopoga i totonu o a latou lava su'esu'ega faa parasaikolosi.

“A e le o se mea faamisiterio,” na fai atu ai Iuri. “O tamaiti ua na o ni savanna, tamaiti lē atoatoa a e talenia. talenia i se tualaga maualuga ese. Na matou taumafai e siitia lo latou mafai—muamua e ala i le faafofoaina, ona sosoo lea ma le faa-inisiniaina faapaiolo. Peita'i ua mavae tausaga, ua faasolo ina lelei su'esu'ega, na matou mafai ona maua tonu le auga e tulaga ese ai tamaiti.”

Na atili ai ona faalatalata atu Makepalai.

“O le autisoma, po o uiga tulaga ese i le mafaufau, e faaoso e mafuaaga fefiloi o le siosiomaga o le tagata, faatasi ai ma le aofaiga o kenera e sefulu. O le mea

na matou maua, o le savanna aupito malosi – la matou vasega Omeka – na latou tauaveina se tolu kenera faapitoa. O le au faailoga tolu kenera. Pe afai latou te aliali a’e i le faasologa sa’o, fefiloi ai ma autisoma maualuluga, ona tula’i mai lea o se savanna talenia e tulaga ese lona maoa’e.”

“I latou ia sa outou togafitia ia maoa’e atili,” na fai atu ai Makepalai. “Na fausia ai se afā lelei atoatoa o kenera ma le paio-faainisia.”

Na lue atu le ulu o Iuri.

“Atamai tele. Atamai silisili. Lona uiga ua sa’o lava lo matou fa’aaogā o Atipale e mailei mai ai se tasi o a outou tamaitiiti Omeka i lumamea. Ma o se mafuaaga foi matou te taofia ai lena teineitiiti.”

Na te’i Iuri. Na lologo lona tino atoa i lona atugaluga. “E lē o ia te outou Sasa?”

Na faanefu le vaai a Makepalai ma nofo faasipa i tua o lona nofoa. “E leai, a e i le itula talu ai, na matou maua ai le mea o taofia ai o ia. Ma e foliga mai o le vaega lava lena e tasi, ua latou auina se vaega’au e tuliloa tulagavae o Atipale. O le mea e laki ai, ua i ai la matou fuafuaga i se auala e matuā soloia ese ai na tulagavae.”

“O ai... o ai o loo i ai Sasa?”

“E te fia iloa?” Na polili ifo ai Makepalai ia Iuri. E manino lava o se mea lea sa tiga tele ai le tamaloa.

“O le a ou faailo atu ia te oe.”

Na ia geno atu ia Segi.

Leai!

Na mumū le fatafata o Iuri i le afi, fetosia i ai laina felavasa i i lona fatafata, a o fesootai lea itu ma lea itu faailogaina, ma fausia ai se faailoga pi’opi’o, o se mataitusi Eleni e mumū.

Na gugulu ane Makepalai i totonu o le auoi a Iuri. “E lē toe umi ona fai i latou ma faafitauli.”

2.04 afiafi.

Agara, Initia.

E ui i ni saafiafiga a lona tamā, a e sa le’i oo lava Elisapeta i Initia. Na ia pulato’a atu mai le veni la’u pasese a o alu ese mai le malae vaalele. Sa i lalo faamalama a e lē tele se lavea’i mai le vevela, e silia ma le selau tikeri.

Na tuai le solo a taavale pei ni anufe, i le va o uta ma avega i taavale tulei e uila ma oo lava i kamela. Sa lata o ia i se tasi taavale la’u pasese, sa i lalo foi ona faamalama, ma na ia lagona ai manogi o le sikā a le ave taavale a o ia lamulamu i lona pito. Na ati le manogi e pei o se agaese i le mafiafia o le sasala o le

kale, fefiloi ma le manogi o otaota ma le ga’o o gasesega. Na faasi’ugutu le ave taavale i le poloka o le auala ma faamamafa ona lima i le pu o le taavale. Sa tau lē lagona le leo o le pu ona o le malomaloā o le vevesi o le taulaga, atili ai i se solo o se faafiafiaga o loo alu i luga o le auala, o iila solo ma leo tetele ai sumepalo. O autafa o faatumulia i tagata feoa’i i le va o taavale, ma i latou saili solo se avanoa mo a latou uila ma pasika.

Na lagona e Elisapeta ua faasolo ina faatopetope ma mamafa lana mānāva, ma ua tau fufusi lona fatafata - e lē mai le vevela ma le susū a e mai le ‘ōmia mai tagata. E le masani ai ona ia latafale, a e o le vāvāō, o le pisi ma le vevesi, o le tauvalaau o le motu o tagata e toatele, na pei ua fufusi ma omiomia ai o ia. Na uu ana moto i ona lima ma tuu i luga o ona vae.

Mulimuli ane, i le fa’aaogaina o le pu o le taavale, na sao atu ai la latou veni i se avanoa ma oo atu ai i le isi magāala. Na liliu i le pi’oga, ma matala atu ai i le lautele e faasino sa’o i le fatu o le taulaga.

Na lagona le faafetai o Elisapeta.

“Ua lelei se ua oo,” na fai ane ai Koualasaki sa nofo i ona tafatafa, pei ua ia faaleo lona fiafia. “Sa lē tatau ona tatou o mai i le veni. E vave atu pe ana ou aumaia i tatou.”

Na faaofiofi le tamaloa laulauā ma oomi o ia, a e na ia lagona le lē nofo lelei o Elisapeta, ona ia taumafai lea e sōsō i tua, a e le’i fesoasoani i isi o lo latou nofoa.

O tala atu o Koualasaki, na uunai mai ai e Sei Rosauo le tamaloa mo se avanoa. Na susulu mai ona foliga i le iila o lona afu. Na ia fa’aaoga le taimi na poloka ai i le auala, e tatala ai lana solo sa nonoa ai lona laulu ma toe gaugau e fai ai lana sikafu i tua o ona taliga.

O Karai sa nofo i luma i le nofoa o le pasese, na ia faalagolago atu i le ave taavale ma faasino atu. Na luelue le ulu o le ave taavale. Ona toe nofo ifo lea i tua o Karai.

O le sui mulimuli o le vaega sa nofo i tua o le veni. O Luka Eni sa laei ona foliga mate gatā, peitai o ona mata sa pei e vaavaai ma maitau mea uma. Na ia fusifusia ni agaese se lua i faamoega i tapulima a e le’i tuua le vaalele, na sauniuni mo se faafeiloaiga lē talimalo i le nuu o ona tagata.

(Soso’o atu Sulu Samoa Aperila 2023)

O LAU AFIGA, O LE SULU I O’U VAE

“²⁵ ‘a o le afiga a le Alii e tumau lea e faavavau lava.’ O le afiga foi lea ua folafolaina atu ia te outou na.”
¹ Peteru 1.

O le ulua’i Tusi Paia sa le’i maua i le gagana Igilisi, a e na o le gagana Latina, le gagana a faifeau Katoliko, ma sa noanoa faapipii i pulelaa o malumalu tapua’i Katoliko. Ona soifua mai lea o Ioane Uikilifi (1328 – 1384), o se polōfesa o mataupu faalelotu i le Iunivesitē Oxford, ua na vaai ma faapea ane, **‘E lē sa’o lenei mea. E tatou i tagata lautele ona faitau le Tusi Paia i la latou lava gagana.’** Sa faailogaina Uikilifi o se tagata pepelo ma faasagatau i le faatuatuaga faaKerisiano, e ta’ita’i o le lotu Katoliko, ma latou ta’ua o ia o se auupega a le tevelo.

E pei o Noa, sa ia tu’itu’i fao i le fausiga o le vaa a o faatauemu ma inosia o ia e tagata, sa faapea foi Uikilifi ona ia amata le faaliliuina o le Tusi Paia i gagana e faitauina ai, a o faatupula’ia le anoano o sauāga faasaga ia te ia. Ina ua mae’a lana galuega faaliliu Tusi Paia, na ia tusia ai i le lautusi o faatomuaga o le ulua’i Tusi Paia faa-Peretania: **‘O lenei Tusi Paia ua faaliliuina, ma o le a mafai ai ona fausia faiga malo a tagata, e tagata, mo tagata.’** Pe tusa ma le lima selau tausaga mulimuli ane, i le 1863 na nonōina mai ai e le Peresetene Amerika o Aperaamo Linikone lenei tusiga, mo lana lauga logologoā o le Gettysburg Address.

O le tolu sefulu tausaga talu ona maliu Uikilifi, na toe faamauina ai foi lona avea ma tagata pepelo taufaasesē i a’oa’oga ma talitonuga a le lotu Katoliko. Sa faapea lava ona toe lagaina a’e ai i luga lona tino maliu, ma susunuina ona ivi, faaliu lefulefu, ma lafoia atu i le Vaitafe Suifi (Swift River). Mai le Vaitafe Suifi, na tafe atu ai i le Vaitafe Avona, ma oo atu ai i le Vaitafe Sevena se’ia goto atu i le Vasa Laolao. Ma o lea, ua avea ai lefulefu o Ioane Uikilifi e fai ma faailoga o lana galuega i le Tusi Paia, o ona talitonuga ma le faatuatuaga, lea ua salalau solo i le lalolagi atoa.

E faapea le mau a le aposetolo o Peteru, **“O le afiga a le Alii e tumau lea e faavavau lava.’ O le afiga foi lea ua folafolaina atu ia te outou na.”**

“¹⁰⁵ O lau afiga o le sulu lea i o’u vae, ma le malamalama i lo’u ala.”
Sala.119.

O upu nei, *O lau afiga o le sulu lea i o’u vae, o lona uiga e tatau ona tatou savavali e tusa ma le finagalo o le Atua, a e lē o tatou lava manatu, mafaufauga, mana’oga ma lagona. O upu, ma le malamalama i lo’u ala, o lona uiga e lē tatau ona tatou o i soo se itu tatou te filifili i ai; a e tatau ona tatou mulimuli i le faasinoga ua uma ona fuafuaina e le Atua mo i tatou. E lē mafai ona tatou sesē pe a tatou saili i le Tusi Paia mo lo tatou faasinoala, peitai e ao lava ona tatou faitau le Tusi Paia i le tulaga tonu o si’osi’omia ai i tatou. Aua le fa’aaogaina le auala o le faamalama-matala, e faataga ai le savili e susu’e lautusi o le Tusi Paia, a o moeini o tatou mata, ma faasino o tatou lima i soo se fuaitau e tau atu i ai, ma faapea ane, ‘O le faasinoga lenei a le Atua.’ Pe afai e faapea ona fai, mata o le a tatou tau atu i le fuaitau, “⁵ona alu ai lea o (Iuta) ua noa o ia e ia.”*
Mata.27.
o le faasinoga lena mo oe i lea aso!

E te fia alu e vaai se foma’i ona o se gasegase faigatā, a e saunoa mai o ia, aunoa ma se su’esu’ega pe siaki lelei, “ua afaina lou fatuga’o”? E te fesili atu, pe faapefea ona ia iloa? A e tali mai, ‘Sa ou nofonofu talu ai i le faamalama ma talitonu i le Atua na te feula mai le savili ma susu’e la’u tusi o faama’i faasino i lou gasegase, ona susu’e mai lea o le itulau o ulutala, Fatuga’o.’ E mautinoa e te alu ese vave mai lena foma’i. O le upu moni e i ai nisi tagata latou te talitonu i lea ituaiga faiga, ona latou oo lea i faafitauli ma faapea ane, ‘O le Atua na faasino ma ta’ita’i mai ia te a’u,’ a e leai ma se aafiaga o le Atua. Pe afai tatou talitonu ma mulimuli i le finagalo o le Atua, ona tatou manuia lea; a e afai e mulimuli i o tatou lava manaoga, ona tatou fetaia’i lea ma mala ma puapuagā.

O IESU MA LE AGASALA

“³Ua ta’ita’iina mai e le au tusiupu ma le au faresaio le fafine na maua ina o mulilua; ua tuuina o ia e i latou i totonu; ⁴ua faapea mai i latou ia te ia, “Le a’oa’o e, ua maua lenei fafine ina o mulilua, ua mautinoa lava. ⁵Ua poloai Mose ia te i tatou i le tulafono ia fetogi i maa o e faapea; a o oe, pe se a se mea e te fetalai mai i ai?”...⁶a ua punou Iesu, ma tusi i lona tamatamai

lima i le eleele. ⁷A ua latou fesili atu pea lava ia te ia; ona toe nofo lea o ia i luga, ma faapea atu ia te i latou, “O so outou e leai sana agasala, ia lua’i togi se maa ia te ia.” ...¹⁰Ua toe nofo i luga Iesu, ua silafia ua leai se tagata ua na o le fafine lava, ona fetalai atu lea o ia ia te ia, “Funa e, o ifea ea i latou? Ua le faasala mai ea se tasi ia te oe? ¹¹Ua fai mai o ia, “Le Alii e, e leai lava se tasi.” Ona fetalai atu lea o Iesu ia te ia, “Ou te le faasala foi ia te oe; alu ia oe, ‘aua e te toe agasala.” Ioane 8.

E tolu ni mea na faalauiloa mai e Iesu i lea aso: Muamua (1) *O le ola faafoliga sautualua.* Pe afai sa maua le fafine o mulilua, e pei ona latou molia e mautinoa lava, o lona uiga sa tatau foi ona latou iloa le tamaloa ma latou molia faatasi i la’ua. O le ituiga amiolētonu, faailoga tagata lenei ua oo mai lava i ona po nei - e vaai maualalo i nai tina ma tamaita’i ona o ni o latou masei i le tuana’i, e tauave foi e fanau teine le mamafa ma tuatuagagia o sauaga ma faiga uō lē pulea lelei, a e faasao le vasega o alii ma tama talavou e aafia ai. Na fa’aaoga ma’a e faresaio ma tusiupu lutaia i aso la; ua tatou fa’aaogā upu ma tala, o foliga ma amioga fa’aalia, e fetogi ai tagata i aso nei, a o le i’uga lava e tasi, o le faamanu’alia o le loto ma le agaga o le tagata i moliaga ma le ola faamasinosino.

Lua (2) *O ai le tagata e toatasi e agavaa e faamasino?* ‘O so outou e leai sana agasala, ia lua’i togi e ia se maa.’ Na o le toatasi lava le tagata e leai sana agasala, sa i ai i le malae ma le faapotopotoga i lea aso, ma soo se taimi i soo se nofoaga - na o Iesu. O Ia e toatasi e mafai ona faia le faamasinoga ma le faasalaga, auā e amiotonu ma mamā o Ia.

Tolu (3) *E mafai ona e tula’i mai i se tulaga faaeaina maualuga, e sili atu nai lo ananafi.* ‘Alu ia oe, ‘aua e te toe agasala.’ Pe afai e toe faamatalaina lenei fetalaiaga a Iesu i nisi upu, e mafai ona faapea, *Alu ia oe ua e saoloto, ua faamagaloina au agasala uma, ua tanumia iinei lou tagata tuai, ua toe maua lou avanoa e fai ai se isi amataga fou, e te faia ai nisi mea lelei e tele i le lumana’i, mo le viiga o le Atua. Amuia oe, e te mafaia mea uma, ina ua oulua fesaga’i ma Iesu.*

“E tatau i lē alu atu i le Atua ona talitonu o loo soifua o ia, o ia foi na te tauia mai o ē matuā saili ia te ia.” Eperu 11.

E i ai le talitonuga o lena e te faatuatua i le Atua, ua matua, ua malosi ma ua maua’a foi lena faatuatua. A e fia saga fafaga atili pea, e ala i nisi nei o mau maututū e tolu faavae mai le Afioga paia a le Atua, e saga tupu atili ai ma fua tele ai le faatuatua, ma maua mai ai i’uga lelei. *Muamua, ia talitonu i le Atua o loo soifua o Ia.* O le malosiaga o le gagana o loo fa’aaogā iinei, e sili atu nai lo se faamaoniga faalēmanino o le i ai o le Atua. Ua iloa e le lalolagi le faaputuga o atua eseese, peitai o le Atua o le Tusi Paia, e lē o se tasi o ia atua, pe faapea foi o Ia le Atua e aupito sili o ia atua uma, e leai. Ua na o Ia lava le Atua e toatasi! Ma o le mau lea mai le Afioga a le Atua, o Ia le Atua e moni, atoatoa, faavavau, e soifua ma e i ai, o loo i ai o Ia i mea uma lava.

O lona lua, ia e talitonu e mafaia e le Atua. Na o ane tauaso e toalua ia Iesu, na faatoga ane e fia pupula o la’ua mata. Na fesili atu Iesu, “²⁸Ua oulua faatuatua mai ea ia te au ou te mafaia lenei mea?” Ona la fai mai ai lea ia te ia, “Ioe, le Alii e.” ²⁹Ona pa’i atu ai lea o ia i o la’ua mata, ua faapea atu, “E pei ona oulua faatuatua, ia faapea lava ona faia ia te oulua.” ³⁰Ona pupula ai lea o laua mata.” Mataio 9. Sa silafia lelei lava e Iesu na te mafaia ona faamalolo, faapupula mata o soo se tauaso, peitai na Ia fia silafia, pe talitonu i la’ua nei, na te mafaia ona fai. Se’i vaganā ua e talitonu i le mafaia e le Atua ona faataunuu ou mana’o, ona faato’ā faia lea, a e afai e leai, ona leai foi lea o se faavae o au tatalo ma ou manaoga o valaau ai ia te Ia.

O lona tolu, ia e talitonu e loto i ai le Atua. Pe afai e uma ona e talitonu e mafaia e le Atua, e ao ona e laasia le isi sitepu faalefaatuatua – e finagalo i ai o Ia. Na alu ane se tasi lepela ia Iesu fai ane, “²Le Alii e, a e finagalo i ai e te mafaia lava ona faamamā mai ia te a’u.” ³Ona aapa atu lea e Iesu o lona aao, ua pa’i atu ia te ia, ua faapea atu, “Ou te loto i ai; ina mama ia oe.” Ona mama loa lea o lona lepela. Mata.8. Ioe, e finagalo malie i ai le Atua, e tali le mana’o o le tagata e talitonu i ai. Ia silafia, o Ia, a e lē o tatou, o loo faamauina i ana lava Afioga Paia, “na te tauia mai, o ē matuā saili ia te ia.”

****O Ē UA MALILIU****

UPUIA ELISA TOFETE **LILO OLA FUI'ĀVAILILI** **(5/4/1938 – 3/3/2023 (84+10+27))**

O le tina matua o le aulotu EFKS Tanoalei'a. Sa soifua mai i le Aso Lua, 5 Aperila 1938, a e na valaauina e lona Matai i le Aso Faraile 3 Mati 2023. Ua 84 tausaga, 10 masina ma le 27 aso o lona soifua. O ona tua'ā o Elise Masina o Luatuanuu le tamā, a o lona tina o Pa'upa'uiaaeoiolepea Faatau Elisa o Vaiusu. Sa faaipoipo atu ia Tofete Lilo Ola Fui'āvailili. E toa 6 le fanau, 26 fanau a fanau, 39 fanau a fanau a fanau; e 71 i latou na tutupu mai ia te ia. O lona soifua a'oa'oina na amata i le A'oga a le Faifeau, o Vaigaga Primary School, A'oga Itumalo ma sosoo ai ma le Aoga Faa-Faiaoga (TTC). Sa faiaoga, tausī aiga ma o i la'ua ma le tamā o tagata fai pisinisi. Sa molimauina o se tina e maualuga lona soifua faaleagaga. Sa avea ma tiakono a o soifua le tamā, i Luatuanuu, Tanoalei'a faapea le aulotu i Titirangi Aukilani Niu Sila. E loto maulalo, e fa'aaloalo, e tumu i le alofa, e tausī faifeau, ma alofa i isi tagata. E loto aiga ma osi aiga, e mamae ma faamaopoopo ona aiga. O lana upu tautū mo lona aiga ma lana fanau, ia to'a'aga i le lotu. O le pine o lea mau e faamanuiaina fanau, e faamanuiaina fanau a fanau, i le mata felefele o galuega e tofofi i ai e le Atua. O nisi fanau a Upuia o loo fai ma faletua o faifeau i le galuega a le Atua (Miriamā Lavasii EFKS Titirangi, Tamara Esera EFKS Sapapalii). O lona sauniga faaleaiga sa faia lava i le Fale maliu o Sefo Pa'u. Sa ta'ita'i i le susuga Tafesilafa'i Lavasii o le faafeagaiga EFKS Titirangi, faapea foi le lagolago a le susuga Esera Esera FNA, Faifeau Faiaoga Kolisi Faafaiifeau Malua. O le aufaipese EFKS Tanoalei'a sa lagiina viiga o le Atua ma pese o le sauniga. Sa molimau fanau ma fanau a fanau i le galuega tele sa feagai ma le tina, e lē gata o le tausiga o ana fanau, a o fanau a le aiga atoa. O le tina e fiafia ma amio tausaaafia; e aulelei lana tusitusi, o le faailoga o le tagata sa a'oa'oina lelei i le A'oga a le Faifeau. Sa matuā faatumulia lona toe sauniga i le aufaigaluega a le Atua i fata faitaulaga e fia, faapea Samoa potopoto. O a'u sa ta'ita'i i lona toe sauniga, o le susuga i le faifeau o Charles Banse FS sa momoli maia lona sa i totonu o le malumalu, ma faitau le Tusi

Paia. O le susuga Tupu Selu FM (Tausi Matagaluega, Metotisi Vaivase uta) na saunia talosaga, a o le Toeina Faatonu o le Matagaluega Vaimauga, susuga Aila Patea FT o le faafeagaiga EFKS Luatuanuu, na saunia le Lauga. O a'u na saunia lona molimau faaleagaga, ma le Upu mulimuli. ***O le Atua faauōuō ma faalatalata mai i ituaso e faigatā ai le savaliga, faapei ona ia fagaina ai le perofeta o Elia ina ua sola ese.*** Ona sosoo ai lea ma lona sauniga mulimuli i lona oliolisaga tumau i Tanoalei'a, Vaivase-uta lava. Ma matou faamavae atu ai i le Pese faamavae a le au Kerisiano, *Talofa uso e, tofaina oe, Ua sau le itupo e malolo...* Ia manuia lau malaga tina, tatou te toe feiloai i se aso o lumanai.

***Saunia: Susuga Enefatu Lesa FT,
EFKS Tanoalei'a,
Matagaluega VAIMAUGA.***

TIUMALU MONA **DIANA O'BRIEN**

8/10/1958 – 8/2/2023 (64+4+1)

O le Tina Tiakono o le EFKS Elise-fou ia Tiumalu Mona Diana O'brien, o ona matua, o lona tamā o Taru O'brien a o lona tinā o Meta Taru O'brien. Na soifua mai o ia i le Aso Lulu, 8 Oketopa 1958, a e na maliu foi i le Aso Lulu, 8 Fepuari 2023. E maliu le afioga i le Tina Tiakono ua 64 tausaga, 4 masina ma le aso e tasi o lona soifua. Sa maliu lava i lona aiga i Elise-fou, i gasegase na faataotolia ai (stroke, cancer). Sa galue Tiumalu i le Matagaluega o Faamaumauga a le Malo (Statistics Dept), o le Lotto Samoa faapea le Island Style. Sa faaofia i le Tofi Tiakono i le aso 2 Setema 2020, ma amata galue ai e oo mai lava ina gasegase. O se Tina e lē lagona se leo i filifiliga ma fono a le Ekalesia. O se tagata foi e filemu ma e to'a, e lē soona gaioiā. O lona toe sauniga sa faia lava i le malumalu EFKS i Elise-fou i le Aso Faraile 17 Fepuari 2023, i le 8.00 i le taeao. O a'u sa ta'ita'i, o le susuga ia Panapa Jnr. Panapa (FNA) na faaulufaleina lona sa. O talosaga na saunia e Ta'atiti Seve Sinei Fili (AF), ma le faitauina o le Tusi Paia, na fofogaina e Taefu

Salapu Asalele (AF). O molimau o le aiga, o le Afioga ia Su'a Elia Tafue ma Te'o Tavui, a o le fanau o Errelynn ma Angelique Kaylani (Kaēi) a e ou faai'uina i le molimau faa le Agaga, ma na faavae se mafauauga mai le 1 Korinito 15:53-55. Sa molimau lona aiga ma lana fanau e faapea, o Diana o se tagata osi aiga, e agamalū a e loto toa, e filemū, e tausi matua, e fai fanau, a e faasili ai lona faamalosi e tautua le Alii, e ala i lana Ekalesia. O le upu faamafanafana sa saunia e Panapa Jnr Panapa (FNA), na fa'aaogaina lava le Tusi faitau o lona aso (Iakopo 3:13-18). Na mae'a le sauniga, ona molimoli atu lea o lona tino maliu i lona Oliolisaga Tumau, i le fanua tanu i Tafaigata. Ma matou faatofa atu ai i le tina Tiakono i le pese faatofa a le au Kerisiano, "Talofa uso e, tofaina oe..." Ia manuia lau malaga Tiimalu.

***Saunia: Susuga Reupena S. Nofoaiga FS,
EFKS Elise-fou,
Matagaluega FALEATA.***

NETINA MAIAVA

(19/11/1959 - 19/11/2022 (63yr))

O Netina Maiava na tupuga mai i ona matua o Tulua Matapula o Sala'ilua Savaii le tamā, ma Lekea Sone Tulua o Solosolo le tinā. O ona matua fai, o le faifeau o Rev. Mikaio ma Tauue, sa galulue tausi Aulotu i Atu'u, Amerika Samoa. Na faaipoipo atu o ia ia Peseta Faamago Maiava. Na soifua mai o ia i le Aso Tofi, 19 Novema 1959 i Sala'ilua, a e maliu i le Aso Toona'i, 19 Novema 2022, ua atoa lelei ai le 63 tausaga o lona soifua. O Netina e to'aluana lana fanau fai, o Pelenise (Mrs. Bernee) ma Seviah F. Tunupopo. E to'atasi le fanau a lana fanau, o Blessed Maiava, a e to'afa lana fanau tausi - Shelly Pefua, Silautiti Sone, Solema Sone ma Paulo Tulua. E to'a 4 ona uso, to'a 5 tuagane, a e 13 ona tuagane ma uso fai. E tele gasegase faigata sa a'afia ai lenei tina, a e peitai ina ua aafia lona fatu, ona vaaia loa lea ua amata ona faasolo faaletonu lona malosi. Sa fe'avea'i i falema'i ma toe foi mai i le aiga pe a tau maua lona feoloolo, a e peitai o ia lava sa pei o le laau e tu a ua oia.

O Netina Maiava o le tagata lava o le galuega, o ia o le poutu toa o lenei aulotu e ui ina o se tina ma'i. E le'i avefa le a'afia o Netina i ma'i eseese, e

faalavelaveina ai lona naunau e faatino lona valaauina. Soo se vaega lava o le galuega, o Netina o le lima taumatau i le tina o le galuega. O se tina e oso tatau i soo se mea e fai. A oo foi i le itu i fafo o le galuega mo lona atiina a'e ma le faaleleia, sa le'i fia nofonofa, a e tau setusetu mai lava o ia i le fia auai, ona o lona naunautaiga ia lelei ma maopopo se faamoemoe mo le manuia o le galuega, a o le viiga lea mo le Atua. O Netina sa gasegase ma vaivai lona soifua faaletino, a o lona loto ma le agaga fia auuuna mo lona Matai, e matua tele lava, malosi ma maloloina lelei. O Netina ma Peseta sa avefa muamua i la'ua o tiakono i le amataga o la matou galuega. Sa taumafai Peseta i le su'ega mo le tofi A'oa'o Fesoasoani ma faamanuiaina ai, ma galulue ai o le A'oa'o Fesoasoani i le Ekalesia. Peita'i o le aafia ai pea o le tamā o le aiga i vaivaiga ma faaosoosoga, na faamavae mai ai i la'ua mai le tofi A'oa'o Fesoasoani. Sa le'i avefa lea faaletonu e faavaivaia ai le soifua galue o lenei tina. Talu ona amata le galuega i le 1999, sa le'i misi le tausiga o le faifeau ma le aiga, a e maise lava i Aso Sa.

O lona sauniga faale'aiga sa ta'ita'iina e le susuga Tavita Peteru, o le faifeau o le Faalapotopotoga a le Atua (AOG). O lona toe sauniga sa ta'ita'iina e le Toeaina susuga Tinetai Gafa FT, tatalo le susuga Peniamina Filivaa FS, a o le Upu faamafanafana sa saunia e le susuga Arnold Fautanu FS. Na molimau lona to'aluana o Peseta Maiava, o le sui o le fanau ma le sui o le aiga. Na molimauina ai a o i ai Netina i Atu'u, sa avefa o ia ma Faia'oga Aso Sa, sui o le Aufaipese, le Autalavou ma le Mafutaga Tina i lona foi aulotu. O itutino foi ia o le Ekalesia i Lamepa o le Ola, sa auuuna faamaoni ma galue malosi ai o ia. O a'u sa faia lona molimau, ma lona sauniga faapitoa auā sa faaliu efuefu lona tino. Fai mai Upu i le Kenese 32:31, "Na alu a'e le la o ui ane o ia i Penueli, ua setusetu foi lona vae." O Netina sa setusetu ma fai lana tautua mo lona Atua. A e peitai e ui ina sa setusetu, a o ia lava sa faamanuia i ai le Atua e pei o Iakopo. Sa matou faamavae atu ia te ia i le pese faatofa a le au faatuatua, Talofa uso e, tofaina oe, ua sau le itupo e malolo...ona tuu atu lea o ia i lona Matai. Ia manuia lau malaga tina. Tofa, tofa, tofa.

***Saunia: Susuga Sisigafu'a Bentley FS,
EFKS Lamepa o le Ola,
Matagaluega HAWAII.***

UPUIA ELISA TOFETE
LILO OLA FUI'ĀVAILILI



TIUMALU MONA
DIANA O'BRIEN



NETINA MAIAVA



Tiakono Toeaina & Faletua, Matai'a Apisaloma & Simalua, i le Faamati a FALEATA



Faletua o Toeaina ma Faafeagaiga, Mafutaga Tina Matagaluega Vitoria